

Mokgatlo wa Lefatshe wa Bolaodi ba Meedi o boela o kgetha Khomishenara ya SARS hape ka Tumellano ya Bohle

Tshwane, 30 Phuptjane 2024 – Moifo o ka hodimodimo o etsang diqeto wa Mokgatlo wa Lefatshe wa Bolaodi ba Meedi, e leng Lekgotla la WCO, le boetse la kgetha Khomishenara ya SARS Edward Kieswetter ho ba Modulasetulo wa the WCO lekgetlo la bobedi, 2024 – 2025.

Khomishenara Kieswetter ka mora ho kgethwa ha hae o boletse hore WCO e ntse e ba mokgatlo wa bohlokwa haholo ka lebaka la boiqapelo ba theknoloji le ba data e kgolo tse bebofatsang tsa kgwebisano, kgolo ya se bitswang *eCommerce*, mmoho le qeaqeo ya lefatshe ka bophara ka lebaka la tse etsahalang lepatlelong la boemo ba dinaha le dipolotiki.

“Maikemisetso a bohlokwa a WCO mmoho le dinaha tseo e leng ditho ke ho kgothaletsa kgwebisano e molaong, ho thibela kgwebisano e seng molaong le dithoto tse kotsi, le ho netefatsa motsamao o bolokehileng wa dithoto le batho ho phatlalla le meedi e arolang lefatshe.

“Ke ntho e tsejwang hore Bolaodi ba Meedi bo a kopanya ha meedi e arohanya. Empa kopano ena e hara Bolaodi ba Meedi e tlameha ho lebisa maikemisetsong a tshwanang a tlisang diphetoho ho tsa ikonomi le phedisano e ntle bakeng sa baahi bohle ba dinaha tseo e leng ditho,” ho rialo Mong. Kieswetter.

O boletse hore ke tlotla hore a be a kgethilwe hape ho fana ka boetapele bona ba diphetoho mokgatlong ona wa bohlokwa wa WCO tlasa boemo ba jwale bo sa tsitsang. “Hwa bohlokwa Bodulasetulong ba WCO, ke ho netefatsa hore Bongodi ba WCO bo na le bokgoni le tsela ya ho arabela ditlhoko tsa Taolo ya Bolaodi ba Meedi ho phatlalla le lefatshe,” ho rialo Khomishenara Kieswetter.

Ho fumana lesedi le fetang lena, ikopanye le Sarsmedia@sars.gov.za